

列傳第十二上

江陰縣志卷之十六

名宦

梁

司馬筠字貞素河內溫人也少孤貧好學師沛國劉瓛強力專精深爲瓛器及長博通經術尤明三禮梁天監初爲暨陽令有清績入拜尚書祠部郎立朝有慈母服議見南史儒林傳

唐

趙和咸通初爲江陰令才能察事積疑成辯楚州

江陰縣志卷之十六

一

陸廷相寫
何應元刊

淮陰有農爲西隣不認贖契錢八百緡州縣不能直越江來訴乃得白見和嶢疑獄集

李嘉祐天寶中爲江陰令淳雅品藻從政不苛吏民敬愛焉寓遊多題詠爲唐詩人

宋

崔立字本之開封鄆陵人祖周度仕周爲泰寧軍節度判官慕容彥超叛周度以大義責之遂見殺立舉進士爲果州團練推官役兵輦官物道險迺率衆錢傭舟舁歸知州姜從革論如率斂法當斬

者三人立爭曰此非私已罪杖爾從革卒奏論之
眞宗詔如立議特記立名改大理寺丞知安豐縣
大水壞期斯塘立繕治有法進殿中丞歷通州廣
州許州會滑州議塞決河調民出芻槌無筭立受
計度已足用奏免弱不能輸者二百萬天禧四年
知江陰軍屬縣利港湮廢教民濬治農田大利開
橫河六十里通運漕累遷太常少卿歷知根漢相
潞兗鄆涇七州兗州歲大饑募穀十萬餘出賑之
立性謹厚喜論事大中祥符間有事封禪士大夫

爭上符瑞獻贊頌立獨言徐州水江淮旱暵無爲
烈風金陵火皇天示警甚備前後上四十餘事以
右諫議大夫知耀州改知濠州遷給事中告老進
尚書工部侍郎致仕卒

范宗古高平人乾興初自成均博士來守江陰明
習文法開示惻幅鯨豺狼之兇禮芻蕘之善百廢
具舉積訴咸辯范仲淹稱其清風之下人則嘯歌
陽春之來物自鼓舞有自來矣

朱昌符字明之沛國人儒雅端範課功有異等之

效見知軍題名記嘗與王荆公友善其寄答詩篇並足傳云

張其清河人字公長天聖中知江陰軍吏盜官錢三百萬積歲既久其偶得奸伏捕繫連數十人轉運使趙惇謂此應賞典願竄吏吾以聞其曰按盜法也殺人以求賞非吾心也悉召諸吏諭以蚤償則從未減不爾爾曹死矣吏之親屬聞者爭出錢十日而具乃推死者二人爲首餘貸不問趙愧謝曰公長者殆非予所及也

葛閔皇祐中知江陰以軍守田視他郡差厚閔謂瘠人厚已歲所得七百斛盡輸之官運河自黃田港達五瀉堰中多淤梗閔以積潦害稼募里中殷實得粟二萬斛大濬治之長四十里

楊士彥嘉祐中以都官郎知江陰軍濬橫河有高績蔣靜追論之謂其功不在崔立下

王棠紹興五年以左朝奉郎知江陰軍軍故有學後廢爲屯營棠請于朝復之大修起學官招延治中弟子以爲學官弟子員更以軍間田若干願克

學廩事聞上嘉之

徐蕝字子禮河南洛陽人乾道元年知江陰軍時江陰當納臨安府和買紬絹四千餘疋荐遭水患民甚苦之蕝力請於朝得蠲其八之三由是流逋日益還歸民始安業興學以布條化士多悅之樓鐔字巨山淳熙七年以樞密院編修官知江陰軍多仁愛以儒雅飾吏事修建貢院嘉惠學者吏民敬愛焉

施邁紹熙四年以朝散郎知江陰軍時徵科繁重

財用困竭計歲入不穀所供十之六又積逋官錢若干萬緡邁䟽于朝乞恩蠲減大寬民力尤篤意文獻命教授鄭應申續修郡志以傳多考述云戴溪字肖堅永嘉人也嘉泰四年知江陰軍有惠政嘗建安濟院食老而無歸者若干人月給常平軍資庫錢米冬夏各有支犒建貢院大興士類宋史儒林傳中戴溪少有文名先是淳熙五年爲別頭省試第一監潭州南嶽廟紹熙初主管吏部架閣文字除大學錄兼實錄院檢討官正錄兼史職

自溪始升博士奏兩淮當立農官若漢稻田使者
括閑田諭民主出財客出力主客均利以爲救農
之策除慶元府通判未行改宗正簿累官兵部郎
官開禧時師潰于符離溪因奏沿邊忠義人湖南
北鹽商皆當區畫以銷後患會和議成知樞密院
事張巖督師京口除授叅議軍事數月召爲資善
堂說書由禮部郎中凡六轉爲太子詹事兼祕書
監景獻太子命溪講中庸大學溪辭以講讀非詹
事職懼侵官太子曰講退便服說書非公禮毋嫌

也復命類易詩書春秋論語孟子資治通鑑各爲
說以進權工部尚書除華文閣學士嘉定八年以
宣奉大夫龍圖閣學士致仕卒贈特進端明殿學
士理宗紹定間謚文端

趙彥适開禧三年以朝散郎出守初政以興學爲
事新文宣王廟士論多躱之

邢燾嘉定十二年己卯以通直郎出守政尚寬平
才足立事濬九里河城外內之河渠咸有成績橋
梁舍館園池器物之飾釐然一新

顏耆仲龍溪人紹定初知江陰軍蒞政公勤以愛利爲行教民先治小學招童生開敏者若干人旬月有試春秋有補激勸備至又取朱文公所纂小學刻之境内官廨黌舍坊市橋梁倉庫場務凡政事所關以修以建莫不畢舉云

史雋之紹定初知江陰軍三年冬李全梟鳴蟻聚恣爲陸梁直抵海陵聲搖江浙維江陰控帶長江聯淮接海當要害雋之下車踰月赤白囊交至亟請兵分屯以廣聲援報可調殿司禁旅千五百人

來戍制閫兼資叅決列將仍稟節制雋之乃約軍數割隊伍度地宜剗堡柵峙糗糧備器具使之至有所歸作有所用士咸感奮廂禁兩軍士兵弓級與夫屬縣民兵莫不增氣合中外之兵其數及萬自始至迄事軍整民安秋毫無擾皆其備守之策也鄉飲酒禮時俗視爲墜典雋之究古德意能推行之燕席序登環觀歎息君子謂其有補風化甚大

楊孝孺字達甫建安人也熙寧九年以太子中允

知江陰縣爲治有本督農興學遊惰皆習於業平
居好學博覽史傳深得於性命之理言多醇正學
者尚焉

林庚寶慶三年知江陰縣多惠愛嘗增廣漏澤園
又籍餘糧若干以飼獄囚無家屬者其生人之政
可知已

陳剛中紹興五年簽判江陰軍爲政以禮能佐其
長興學教士知本不忘君先是水災視民墊溺請
罷橫征盡蠲是年之稅期必得請至以去留決之

題詩悟空寺惻怛藹然

于溥大觀四年庚寅丞江陰縣職思水利悉心計
畫嘗於黃田蔡涇等處置上下閘提淤去壅板築
甚堅居民食魚與稻無凶歲憂省漕輸之卒過半
又西導申利二港注之晉陵武進旁邑大賴焉
楚執柔政和三年癸巳丞江陰縣善知水道嘗治
橫河市墩新河代洪港使水疏而不壅節而不濫
白鹿化成等十鄉之田頻苦旱澇盡除其患農田
資利計畝凡六千五百七十三頃有畸

表燮字和叔慶元府鄞縣人生而端粹專靜乳媪置槃水其前玩視終日夜卧常醒然少長讀東都黨錮傳慨然以名節自期入太學登進士第調江陰尉浙西大饑常平使羅點屬任振恤燮命每保畫一圖田疇山水道路悉載之羅以居民分布其間凡名數治業悉書之合保爲都合都爲都合鄉爲縣征發爭訟追胥披圖可立決以此爲荒政首除沿海制屬連丁家艱寧宗卽位以太學正召朱熹諸儒相次去國丞相趙汝愚罷燮亦以論去自

是黨禁興矣久之爲浙東帥幕福建常平厲沿海叅議嘉定初召主宗正簿樞密院編修官權考功郎官太常丞知江陰州改提舉江西常平權知隆興召爲都官郎官遷司封因對言陛下卽位之初委任賢相正士鱗集而竊威權者從旁睨之彭龜年逆知其必亂天下顯言其姦龜年以罪去而權臣遂根據幾危社稷陛下追思龜年蓋嘗臨朝太息曰斯人猶在必大用之固已深知龜年之忠矣今正人端士不乏願陛下常存此心急聞剴切崇

獎朴直一龜年雖沒衆龜年繼進天下何憂不治
臣昨勸陛下勤於好問而聖訓有曰問則明臣退
與朝士言之莫不稱善而側聽十旬陛下之端拱
淵默猶昔也臣竊惑焉夫既知如是而明則當知
反是而闇明則輝光旁燭無所不通闇則是非得
失懵然不辯矣遷國子司業祕書少監進祭酒祕
書監延見諸生必迪以反躬切已忠信篤實是爲
道本聞者悚然有得士氣益振兼崇正殿說書除
禮部侍郎兼侍讀時史彌遠主和燮爭益力臺論

劾燮罷之以寶文閣待制提舉鴻慶宮起知溫州
進直學士奉祠以卒燮初入太學陸九齡爲學錄
同里沈煥楊簡舒璘亦皆在學以道義相切磨後
見九齡之弟九淵發明本心之指乃師事焉每言
人心與天地一本精思以得之兢業以守之則與
天地相似學者稱之曰潔齊先生後謚正獻
鄭謬玉山人紹興十二年辛酉除教授學問綜博
志尚高明爲文力去陳腐言多奇勁孜孜獎誘人
才務在成就其訓存諸學記可考也

尤袤字延之無錫人少穎異蔣偕施垌呼爲奇童入太學以詞賦冠多士尋冠南宮紹興十八年擢進士第嘗爲太興令吏民爲立生祠隆興四年戊子注江陰學官需次七年以薦召除將作監簿大宗正闕丞人爭求之陳俊卿曰當予不求者遂除袤虞允文以史事過三館問誰可爲秘書丞者僉以袤對亟授之張栻曰眞秘書也兼國史院編修官實錄院檢討官遷著作郎兼太子侍講歷官至禮部尚書年七十卒袤少從喻樗汪應辰游樗學

於楊時時程頤高第也方乾道淳熙間程氏學稍振忌之者目爲道學將攻之袤在掖垣首言夫道學者堯舜所以帝禹湯文武所以王周公孔孟所以設教近立此名詆訾士君子此名一立賢人君子欲自見於世宜無得免願徇名責實人才不壞於疑似袤死數年侂冑擅國禁錮道學賢士大夫皆受其禍識者以袤爲知言嘗取孫綽遂初賦以自號光宗書扁賜之有遂初小藁六十卷内外制三十卷嘉定五年謚文簡

鄭應申紹熙三年江陰軍教授有文名蒐抉載籍網羅散亡作江陰志一十卷其後同官郭廷堅以紹定壬辰繼至續修其事推揚事類搜剔無遺並有功云

史蒙卿咸淳元年進士調官江陰軍教授蒙卿爲學淹博著書立言一以朱熹爲法

劉光世字平叔保安軍人以江東安撫使自江州移屯江陰紹興五年水賊邵清犯江陰軍爲光世所圍勢蹙乃降餘見宋史本傳

韓世忠字良臣延安人早年鷲勇絕人建炎三年牒報兀朮將自海道窺江淞世忠以制置使駐軍江陰防禦有功餘見宋史本傳

李寶紹興三十一年逆亮犯邊寶統水軍於江陰駐劄虜以海船從膠西進寶率軍裝露橈逆戰火箭射其油帆風利火烈虜船千餘殆盡生獲大漢軍及女真等酋首并其器甲虜氣震懾高宗皇帝遣使諭賚命學士院草詔加節度使寶立節堂于縣治之東偏以侈上賜人徒知逆亮授首于淮甸

不知寶海道之捷有以奪其心也

元

張紹祖字可久元至順中以廷對第五人來尹江陰州持政廉平有節槩門無私謁聰明識事剖決若流人頌其才云

李師善字復初范陽人居身約甚御民有恩剛腸疾惡取怨尤而不悔處同列或謂其專君子曰專在理也鋤強梗或謂其嚴君子曰嚴在法也其賢多矣

韓搏山東益都人延祐中同知江陰州直大不阿勇有氣嘗禁姦戮暴禦災有略爭言省府多從其策督農勸學職職而舉見陸文圭撰德政碑

宋仲仁字春卿聊城人知事大德辛丑秋七月颶風海水暴溢民罹大災幸未溺者纍纍然告飢仲仁以爲州聞于省俟報而行不及救矣亟發廩賑之人懷其德

蒙古丑廝字靜如以世勛佩三珠金虎符官昭勇大將軍鎮江陰謙恪尚義人悅慕之至正十一年

淮西亂督軍九江取道安慶時湖廣威順王在道
王聞侯頓兵卽帳下以退守地虛弱勸侯定計宣
讓王遣使諭旨曰安慶控淮江要衝須侯就鎮前
後出師凡二十九捷十二年冬十一月寇率衆水
陸並進侯連破之翌日復大破之輕舟追後直中
流卒二王哭之厚賻其葬

國朝

周恩台州黃巖人由監生洪武二十七年任廉隅
嚴憚群吏受事唯謹門無私事謁者

蔣宥字文惠錢塘人由進士永樂間任慷慨有志
略不事苛察政平得民心陞建寧府通判

王子倫廣東南海人宣德八年由儒士舉任孳孳
仁愛公正廉平績聞徵拜監察御史去之日行李
蕭然百姓遮道留之泣送者以千數

周斌字國用昌黎人由進士擢監察御史天順元
年以言事左遷下車甫踰月勸善直枉痛繩姦惡
其風大行兄弟垂爭者旣睦男女怨曠者有歸外
雖剛毅人不敢交以私中心篤好人倫喜爲百姓

興利開通河港凡數十處以廣溉灌民享其利他所修舉並有功在任六年遷開封府知府既去邑人爲圖像留衣曷勒碑紀德云

謝寧字安世福之惠安人成化丙戌進士知江陰縣操已端慎馭政公廉篤意蒙養之士建舍立師爰布條化民病旱澇躬禱山川大發倉廩賑之功成徵拜刑部主事

黃傅字夢弼蘭谿人弘治庚戌進士甲寅知江陰縣年甚少吏民或易之公內精敏鋒穎不露南面

受署十日而布令踰三月而令大行獎善禁姦豪猾避罪徙之他郡不敢歸故里先是民俗囂囂持吏短長吏多罷免簿書叢委焚不可治公提綱挈領事事條舉倉庫錢穀歲有輸有供斷以十年按圖追考無私竄自遁者繇是四境肅然官無負租野無敝民紀綱大振性尤崇正黜邪興學校禮賢良去境內淫祠幾盡爲文愛采藻奇言譎辯語出必驚人諸生中有能爲公之文者喜之獨至方謨其一也公初考召入爲監察御史尋以病卒邑人

薛章憲撰去思碑

涂禎字賓賢新淦人弘治己未進士庚戌知江陰
偉幹豐頤意度開豁政暇招延儒生切劘道義慕
宋程朱之學暨本朝理學名臣孜孜訓士非誠意
正心之語不以出諸口斷刑決事惟理之從雖甚
喜怒不以私勝居三年政平刑清小大胥服部使
者數薦其賢徵入爲河南道監察御史正德初逆
瑾擅權操弄威福禎當言事不諱竟爲瑾所中死
于 詔獄棺殮無以爲資訃聞當時父老多至泣
下至今追論其事猶於邑云

劉紘字景瞻安福人忠愍公球之四世孫治春秋
有名中弘治乙丑進士明年正德丙寅知江陰爲
人間暇能謹身癯若不勝衣言簡若訥當廷決事
無衆寡小大犖然當於人心衆皆稱服留心教化
大修起學宮鼎新煥飾比諸大府勾稽里書飛詭
之姦毫髮無遁民以蔽賦輸者若干群吏環立皆
凜凜受事海寇臨城先期備設寇不爲害三吳晏
然績聞召爲南京戶科給事中旣居言路與諸同

官一心多所建明如論竇給事不宜深罪尤大關係又往往獨言戶科事温厚平正得諫官體尋有巨璫使淮怒其姪知州持慶語連及君被逮暑月危途事雖白竟得疾不起年三十有六

王泮字文淵河南磁州人正德丁丑進士授江陰令奉身儉甚衙戶蕭然妻子着貧時荆布人謂其廉也出諸天性不沽名不矯行終三年如一日云被召而行行李一二肩惟來時故篋百姓攀號而送者若干人陞監察御史踰年卒

李鳳字景儀陽曲人洪武十年任江陰丞廉謹惠愛佐政甚著考滿陞泉州知府

黃霆字和之洧川人由恩例正德辛未任江陰丞治農喜接賢士温恭有讓壬申大盜劉齊寇江陰霆着戎衣慷慨誓妻孥曰吾不勝賊吾與汝等共死無爲先人辱登城大呼彎孤射賊賊乃奔亡嘯聚狼山王師至盡戮之其勢已摧於江陰矣霆之勇有氣槩可錄也遷肅寧知縣

王鎬字宗器洛陽人監生弘治癸亥任訓導言貌

肫肫教人有誠意歷八年渾然如昨士多愛之
趙儲蘭谿人由歲貢監生任訓導勤勉諸生日有
課月有試而一時士心興起人稱其道氣得章楓
山之薰陶云

吳良字 鳳陽定遠人初名國興

賜改今名少居里中性剛勁勇有氣略與弟禎並
以膂力稱元末馭失其政海內沸騰

太祖高皇帝奮起布衣思一海宇延攬英豪公兄
弟見曰此眞主也委身以從服勞左右晝夜不怠

充帳前都先鋒 上心倚之甲午秋

上攻圍滁州明年乙未取和陽公爲先驅出死以
戰六月從渡大江元兵陳于采石磯公拔其營大
破之乘勝克姑熟下溧陽溧水丙申從定建康其
功大集又從大將軍魏國公徐達克鎮江下常州
歷陞軍職有差丁酉下江陰命公指揮使領兵鎮
守時僞吳張士誠據姑蘇跨有淮東浙右皮革鮑
木之輸物力殷盛兵馬富強江陰一隅正當喉襟
要地士誠多設變恐將士動搖每以金帛啗之誘

其心

上諭之曰士誠詐人也我以吾誠宜無不克慎固封疆約束士卒毋輕與爭鋒毋逐小利妄動公受命於是繕城池明斥堠礪器械分嚴部曲戒喻禁戢無敢私竄及橫生事者敵畏不敢犯數年

上親帥師下江西討僞漢陳友諒大軍屢出荆襄底定而無東顧之憂者以公爲扞蔽也丁未大軍克姑蘇士誠面縛詣轅門

上以姑蘇重鎮非公不可爰以命公公至嚴紀律

明號令拊循破土軍民帖帖安堵洪武三年天下大定論功行賞授開國輔運推誠宣力武臣榮祿大夫柱國同知大都督府事江陰侯食祿二千五百石賜鐵券子孫世襲五年廣西右江諸州夷俗仇殺數盜邊 命公討之公深入其阻撻彼裔戎數月盡中其地自是蠻夷酋長奉職貢同於藩臣先是齊王受封之國公當營建府第營留青州二載得疾薨享年五十有八計聞

上痛悼輟朝三日 詔所司定贈謚加贈特進光

祿大夫上柱國中軍都督府右都督追封江國公
謚襄烈遣使迎柩以歸賜葬鍾山之陰肖像功臣
廟春秋享祀其子孫籍居江陰中停侯爵言官嘗
奏論之未有復云

吳禎字幹臣鳳陽定遠人初名國寶

賜改今名生而沉毅自少有膽略喜慷慨立事元
政不綱生民塗炭

太祖高皇帝起兵里中公與兄江陰侯良首隸麾
下悉力戰事歲甲午西克滁和乙未六月渡大江

公克帳前都先鋒爲總管尋陞建興翼院判轉分
院元帥丁酉擢天興右翼副元帥與兄良同守江
陰海寇至擊走之杯酒可得首破僞吳張士誠水
寨戮其梟將朱錠以狗甲辰授英武衛指揮使丙
午寇出馬馱沙

上親督戰追至巫子門寇乘潮逆拒公縱兵急擊
之俘獲無筭是秋從大將軍魏國公徐達率馬步
舟師由港口取湖州公勒奇兵出舊館扼之戰大
捷因留戍守吳元年丁未九月復從大將軍攻圍

蘇州連破胥葑二門士誠就執進僉大都督府事
時方國珮據明州未下 上以公爲征南副將軍
從御史大夫信國公湯和徃平之公引舟乘潮夜
入曹娥江夷壩通道出其不意直抵車廐會國珮
已潛移入海復追於盤嶼與合戰大勝盡獲其戰
船人馬輜重而還未幾國珮降有 旨由海洋進
取福州鼓噪而前圍其西南水部三門克之時僞
平章陳友定據延平明年洪武元年正月進攻延
平禽友定閩海平公還次昌國會海盜葉松坡陳

均祥據蘭秀山作叛公調兵悉勦之三年論功行
賞授開國輔運推誠宣力武臣榮祿大夫柱國靖
海侯食祿一千五百石賜鐵券子孫世襲五年壬
子 詔發兵東戍定遼公總舟師數萬由登州轉
餉以給海運大濟七年甲申海上警至公復領沿
海各衛兵出捕至琉球大洋獲倭寇人船若干奏
捷十一年秋輿疾還京

上幸其第命尚醫治療越明年己未五月二十六
日薨計聞

上爲之震悼輟朝三日

詔贈特進光祿大夫左柱國追封海國公謚襄毅
賜窆鍾山之陰葬之日車駕親臨奠賻仍肖像功
臣廟春秋享祀其子孫籍居江陰侯爵未嗣與兄
良同

趙鵬字圖南全椒人以鎮撫守禦恤軍愛民時兵
革初靖積骸徧野鵬於君山之傍掘坑二處悉收
瘞之